



La Chaux-de-Fonds – chapitala da l'industria d'uras.



La chaldra da grippa dal Creux du Van.

Neuchatel – dals crests dal Giura fin a las rivias dals lais

■ Il chantun da Neuchatel è situà en la regiun geografica dal Giura e cumpiglia radund 803 km². Il territori dal chantun cun ses radund 176 000 abitants (2013) sa lascha divider en trais regiuns. Per lung dal Lai da Neuchatel sa tira inastivla da riva che vegn numnada le Littoral. Qua giascha er la chapitala da Neuchatel ed en il nordost tantscha il territori dal chantun fin a la riva dal Lai da Bienna. Davosvart, quasi parallel tar il Lai da Neuchatel, s'extendan duas valladas: la Val de Ruz che giascha en il nordost e la Val de Travers situada en il sidvest. Quest'ultima è enconuschenta surtut tras



l'absint – la spirituosa legendara che vegn er numnada «la diala verda». La terza regiun furma la planira auta da La Chaux-de-Fonds e Le Locle che cunfinescha en il nordvest cun la Frantscha.

Ina rait d'emprima qualitat tranter l'economia e l'industria

Or dal know-how che sa manifestescha en l'industria d'uras dapi il 18avel tschientaner, en sa sviluppada fin oz vastas enconuschientschas spezialas en la microtecnica ed en l'industria da precisium: maschinas d'utensils, tecnologia da gronda precisium, electronica, biotecnologia, tecnica medicinala e.u.v.

Ina stretga colliaziun tranter industrias fitg sviluppada e diversifigadas, cumplessa d'in bun sistem da furnaziun e d'ina lunga tradiziun d'innovaziun e da qualitat han pussibilità al chantun da Neuchatel d'unir sia fermezza remartgabla tant en la perscrutaziun ed il svilup sco er en la produziun. In'ulteriura caracteristica da quest'economia fitg tecnologicada è ses spiert cosmopolitic – in fenomen secundar natural d'in tal center per la perscrutaziun scientifica e tecnica sco er d'ina industria ch'è fitg dependenta da l'export.

La regiun da Le Locle e La Chaux-de-Fonds

Per l'industria d'uras furman Le Locle e La Chaux-de-Fonds ensem en center impurtant da renum internaziunal. Il museum d'uras – il Musée international d'horlogerie a La Chaux-de-Fonds – unescha ina collecziun da passa 4500 objects e mussa l'entira istorgia cronometrica.

Suenter ils gronds brischaents tant da La Chaux-de-Fonds (1794) sco er da Le Locle (1833) en ils lieus vegnids reconstruids tenor in sistem da vias sumegliant ad ina tavla da schah. La Chaux-de-Fonds è la terz gronda citad da la Svizra franzosa (suenter Geneva e Losanna) ed è in exempel admirabel da l'urbanistica. Enconuschentas sin tut il mund en las

ovras architectonicas da Le Corbusier ch'è oriund dal Giura neuchatelais: La villa turque e la maison blanche en dal rest avertas per la publicitad. La citad che sa chatta sin 1000 meters sur mar è ultra da quai in center impurtant dal jugendstil.

La chapitala da Neuchatel: tranter lai e guaud

La fama di che la citad da Neuchatel saja glischnada dal guaud en l'aua. Quai ha ella fatg cun eleganza e pragmatism. Ses quartiers en construids sin stalims ed ils edificis consistan da crap da chaltschina da color oca clera da Hauterive. E sin il lai (dal reminent il pli grond che sa chatta dal tutfatg sin territori svizzer) ha la citad gudagnà nov terren per il turissem e l'industria da temp liber. L'entir traffic vegn guidà tras tunnels – la surfatscha averta stat a disposiziun per la recreaziun.

Neuchatel è sa derasà enturn in grip, sin il qual steva en il 10avel tschientaner in nov chastè, il Novum Castellum. Il pitschen lieu da martgà è daventà in principadi sut influenza franzosa ed è alura i en possess dals retgs prussians. L'istorgia variada da la citad sa fa valair dapertut: sper la sedia feudala da la regenza posseda Neuchatel ina catedrala, chasas signurilas, veglias piazzas e giassas scharmantas (oz zona da peduns e da commerzi), museums attractivs ed ina universitad.

L'architectura moderna cun il Latènum (museum d'archeologia), cun l'hotel Palafitte sin il lai sco er cun il Centre Dürrenmatt, ch'è vegni planisà da Mario Botta, n'è betg main represchentativa.

Istorgia

La regiun a la riva dal lai è abitada dapi 15000 onns. Las culturas surregiunalas da Cortaillod (temp neolitic) e da Latène (Celts) en schizunt vegnidas numnadas tenor lieus da chat situads en il chantun da Neuchatel.

En il temp medieval tempriv fascheva la regiun da Neuchatel part dal reginavel da Burgogna. Alura è il principadi da pli tard daventà in bain imperial ed è vegni administrà da diversas famiglias pussantas sesentas en la regiun. En il decurs dal 14avel e 15avel tschientaner è Neuchatel er s'avischina politicamain a Berna ed è daventà in lieu allia da la Confederaziun.

Sut l'influenza da Guillaume Farel è vegnida introducida il 1530 la refurraziun en bunamain tut las vischnancas da Neuchatel. Sinaquai è la regiun da Le Locle e La Chaux-de-Fonds daventada in refugi per blers protestants franzos, ils uschenumnads ughenots.

Il 1707 è morta ora la dinastia dad Orléans-Longueville ch'aveva regi Neuchatel sur varga 200 onns. Dals divers candidats per surpigliar il principadi ha la finala pudì sa far valair il retg da la Prussia. Sut il govern prussian scleri ha Neuchatel fluri

economicamain ed ha er dà in temp asil al filosof Rousseau che vegniva persequità tant da la baselgia catolica en Frantscha sco er dals signurs protestants a Geneva.

Suenter ils embrugls napoleonics ha il Congress da Vienna transfurmà Neuchatel en in chantun da la Svizra, senza dentant schliar l'appartegnientscha dal principadi a la Prussia. Questa posiziun dubla ha manà a divers conflicts (revoluziuns da la populaziun neuchatelaisa dal 1831 e 1848, putsch roialistic dal 1856). Tras intermediaziun dal retg franzos Napoleon III è la finala i a fin il domini prussian il 19 da zercladur 1857.

Festas commemorativas

Ils 12 da settember 1814 è Neuchatel vegni integrà en la Dieta federala. Malgrà quai tutgava il chantun vinavant er anc al retg da la Prussia. Perquai eri scumandà als abitants da la Val-de-Travers da festegiar la nova appartegnientscha a la Confederaziun. Ma quels n'han betg gi tema ed han guntgì il scumond, fidels a lur spiert revoluziunari, pigliond la festa dals bigls tradiziunala sco pretext per celebrer tuttina. En dus lieus vegn anc adina celebrada la festa dals bigls, numnadamain a Buttes ed a Môtiers.

Il prim da mars 1848, la data da la revoluziun a Neuchatel, vegn festivà en furma d'in marsch tradiziunal. Participants da tut las parts dal chantun sa rimnan la damaun marvegli a Le Locle. Suenter marschan els a La Chaux-de-Fonds ed a La Vue-des-Alpes, fan in pitschen detur als vitgs Malvilliers e Valangin ed arrivin la fin finala al chastè da Neuchatel. Quest trajet da 30 kilometers absolvan ils participants vestgids bel chaud per gronda part sin vias. Els suondan la via dals revoluziunaris ch'han stgatschà l'onn 1848 ils chastellans prussians, passa 30 onns suenter ch'il chantun da Neuchatel è entrà en la Confederaziun svizra.

Pitgels da Neuchatel

Il chantun da Neuchatel è ditg stà enconuschent per sia industria da pitgels da fis. Già en il 17avel tschientaner era quest product da luxus fitg derasà tar las damas noblas da tut l'Europa. En questa regiun ha l'industria da pitgels occupà quella giada tschintg fin sis giadas dapi persunas che l'industria d'uras! Il pitgels da Neuchatel en pitgels da fis sin in fons cler da glin u da saida – in uschenumnada «blonda» – cun in muster specific ch'è per uschè dir sia caracteristica. Ils motifs sa sviluppan cun la moda, ina giada è quai il pitgel da Mechelen, lura quel da Valenciennes, lura il pitgel da Binche... e blers auters pli cun numerus nums malizius. Ma questa alternanza era favuravla per las battarinunzas da Neuchatel, perquai ch'ellas empruvavan ora gugent insatge nov ed eran adina avertas per midadas.

La produziun mecanica da pitgels da fis en Engalterra ed il collaps dals pretschs ch'ella ha chaschunà han instradà cun la nova moda a partir dals onns 1830 la mort da la produziun locala. En il fratemp è il battarinar daventà exclusivamain in pasatemp, resta dentant collià inseparablamain cun ses passà gloriuos. Oz na vegn la tecnica betg pli mussada uschia sco ch'ella vegniva pratigada oriundamain, ma ella ha tuttina survivi. In pèr battarinunzas intgantadas en anc adina ablas da reproducir ils models vegls e da sa laschar inspirar da quels per crear novs models tenor lur exempel. Intgins museums sco quel da Valangin, il Museum puril da La Chaux-de-Fonds u il Museum regiunal da la Val-de-Travers undreschan dal rest l'anteriura produziun da pitgel.

Inschign dals urers

I n'è nagin secret: La fabricaziun d'uras ha influenzà fermamain il svilup da l'artisanat, da l'industria e da la societad da l'artg giurassian. A partir dal 18avel tschientaner è l'industria d'uras ch'è sa furmada a Geneva vegnida transferida en regiuns pauc populadas sco la Vallée de Joux ed il Giura neuchatelais. Entant che la produziun sa basava l'emprim sin il princip da montar cumponentas cumpradas («éta-blissage»), en silsuenter – sut la pressium da fabricas americanas – vegnidas endrizzadas er en Svizra fabricas da produziun standardisada. Parallelamain en naschidas las emprimas grondas scolas d'urers. Il 20avel tschientaner è il svilup da l'industria d'uras svizra – da la realisaziun d'in cartel, sustegnì da las bancas e da la lescha, fin a l'installaziun da gronds concerns d'uras – caracterisà da duas crisas successivas.

En las valladas dal Giura ha il svilup da la fabricaziun d'uras prendi ina via speziala: malgrà ch'il model da produziun american è sa derasà praticamain en tut la Svizra, è la produziun fragmentada d'uras sa mantegnida en il Giura. E schizunt pitschnas manufacturas independentas han pudì surviver. Ils numerus manaschis pitschens ch'èn sa domiciliads là, creeschan ina gronda valur ed èn oz in factur indispensabel per la fabricaziun d'uras da luxus, cun las qualas la Svizra ha acquistà sia reputaziun excellenta e mundiala en quest sector. La precisium extraordinaria ch'è necessaria en il sector da la fabricaziun d'uras e las competenzas ed abilitads unicas dals urers permettan ozendi al marketing da l'industria d'uras da colliar cun las uras svizas in image spezial che sa basa sin luxus e sin qualitat d'emprima classa.

Scuvrir bellezas da la natira

Il chantun da Neuchatel cumpiglia dus pars naturals: il Parc natural dal Doubs (ensem cun ils chantuns Berna e Giura) ed il Parc regional Chasseral (ensem cun il chantun da Berna).

Il Doubs furma sur 40 km in cunfin natural tranter la Svizra e la Frantscha. A Les Brenets è quest miracul da la natira spezialmain impressiuant: il flum sbucca en in lai tschinclà da parais-crap abruptas cun auas paschaivlas che creschan tuttenina a cascadas: in exempel fantastic è il «Saut-du-Doubs». Ins cuntanscha el a pe davent da la piazza da sbartgar. L'aua cuntinescha ses viadi en las chavorgias selvadias che traversan Goumois per arivar al «Clos du Doubs» e per turnar alura puspè en Frantscha.

Il segund parc, il Parc regiunal Chasseral, è situà en il nordvest dal Lai da Bienna. El giascha surtut sin il territori dal chantun da Berna, ma cumpiglia er intginas vischnancas da cunfin dal chantun da Neuchatel.

In'ulteriura attracziun naturala furma il Creux du Van, situà en la regiun da cunfin tranter ils chantuns da Neuchatel e da Vad. I sa tracta d'ina chaldra da grippa impressiuanta, en la quala vivan trieps da chamutschs e da capricorns. Betg lunsch davent mainan las Gorges de l'Areuse tras in cuntrada mirvegliusa cun insaquantas cascadas e grottas.

Fanel al Lai da Neuchatel

Fanel, la regiun planiva da las rivias setten-triunalas dal Lai da Neuchatel posseda in impurtanza internaziunala sco spazi da viver per utschels da l'aua e da pali. Quest reservat natural è vegni revitalisà durant ils onns 1986-1988. Tar las correcciuns dals Lais dal Giura (ils Lais da Murten, da Neuchatel e da Bienna) avevan ins restrenschi la fluctuaziun da la surfatscha dal lai e midà qua tras il svilup da la vegetaziun ed ils currents dal lai.

En rom da las mesiras da revitalisaziun han ins allontanà la glitta ch'era s'accumulada en il decurs dals onns per reducir l'eutrofisaziun da l'aua e la terrenisaziun da las rivias. Pli baud vegniva la channa al Lai da Neuchatel utilisada per far mattas e plattas d'isolaziun, oz la dov'ins per covrir las vignas. Cunquai che la channa vegn tagliada e manada davent regularmain, na smarschescha ella betg pli a la riva uschia che la terrenisaziun dals lais po vegnir retardada.

Era ils prads da charetsch ston vegnir segads regularmain, uschiglio creschan els en e diventan la finala guaud. Il charetsch vegn duvrà sco sternim per il muvel u per cumpostar. Cur ch'è en inundads, porschan ils prads da charetsch segads vivonda abundanta per ils utschels da l'aua e las andas.

La presentaziun:
Dossier «Chantun da Neuchatel»

Dapli infurmaziuns:
chatta.ch/?hiid=3596
www.chatta.ch